

De excidio Castilunclii [a] et Susinane [b] et terrae
Petri Pagani [c].

CAP. CXXVIII.

Post inefabilem [a] genetricis Dei partum anno MCCVIII, quia Petrus Paganus nolebat obedire Gerardo Rolandini potestati, ut juramento tenebatur, equitaverunt Faventini Susignanā [e] [A] et in plebatu de Mulleo [f], incidentes vineas et arbores antiquissimas, comburentes messes et alia pertractantes hostilia [g], quae ante illum nullus tentaverat [h] ob locorum difficultatem et asperitatem viarum. Anno eodem destruxerunt in mense decembris Castilonclum praedicti Petri castrum. Deinde ipse Petrus venit ad mandatum civitatis, omni pactione remota.

Quando Faventini ierunt in servitium Bononiensium super Mantuanos, et quando Marchio expulit Salinguerfam filium Taurelli de Ferraria.

CAP. CXXIX.

Anno Domini MCCVIII cum Mantuani obsiderent Suzaram castrum Reginorum [i] [B], quod situm est inter districtum Regii [j] et Mantuae; Regini invitaverunt Bononienses; quibus Bononienses honorifice volentes succurrere, in suum servitium Faventinos una cum Imolensibus vocaverunt. Post quam vocationem nostris gratissimam [k], oneratis pluribus mille plaustris victualibus atque armis, praeparatis etiam omnibus ad expeditionem pertinentibus, infra v dies Faventini juxta Burgumnovum hospitati sunt. Deinde ad praefatum castrum pro voluntate ierunt Bononiensium. Quo Mantuani audito, Veronenses, Ferrarienses atque marchio Azolinus [l], dimissis manganis circum castrum praedictum, fuga evaserunt praecipiti. Sic quoque tempore illo in partibus illis magnificatum est nomen Bononiensium, qui cum carotio et tot et talibus amicis Reginis succurrerant, expellendo ab eorum castro tot cum tanto marchione populos. Hic enim marchio Azolinus de Este [m], occasione dissensionum quae consueverant esse in civitatibus, Veronam tempore illo ceperat atque Ferrariam,

[a] Castilunclii. Sic C. M., vulgo Castiglioneo. — [b] et Susinanae. Sic Codd. — [c] et terrae. Sic C. M. An omittendum et? — [d] Post inefabilem. Sic corrigo. Post inefabile, Codd. — [e] Faventini Susignanā, C. M.; Faventini Susinanā, C. V. — [f] in plebatu de Mulleo. Sic Codd. et Tondutius. — [g] et alia pertractantes hostilia, C. M.; et alia pertractantes hostiliter, C. V. — [h] ante illum nullus tentaverat, C. M.; antea nullus ante illum tentaverat, C. V. An legendum ante illos etc? — [i] Reginorum. Sic Codd.; id est, Regensium. — [j] Regii. Sic Codd., id est Regii Lepidi, vulgo Reggio di Lombardia. — [k] nostris gratissimam, C. M.; sed deest in C. V. — [l] Marchio Azolinus. Sic Codd. — [m] de Este. Sic lego. Codd. habent, de Est, etc.

[A] Susinana erat in Apennino, prope flumen Sennium.

[B] Suzara, vel Suzzara, locus est non procul Luceria, vulgo Luzzara, in ducatu Mantuano.